

行有恆堂初集 卷下



行有恒堂初集卷下

定郡王著

送錢撫棠師歸里之作

待敷霖雨濟蒼生疏傅襟期畫錦榮

師被重來復以疾召

辭蒙

叨 召見 諭以秋初歸里疊温語移時

紅蓼白蘋雙槳下淡

煙疎雨一樓迎

嘉興有樓

藝林八法叨評論

師曾教于作字

法文筍駢珍愧拜擎綠野堂開多樂事重看九老

會耆英

題桃花扇

江水滔滔日夜流沙場征戰未應休英雄健骨歸

黃土紅粉芳顏換白頭烽火連天何日了干戈徧
地幾時收堪嗤風土癡情甚故遣愁湖喚莫愁

其二

天翻地覆立新君江北江南正駐軍社稷已經歸
有道朝廷久不重斯文孤忠妄念勤王事大佞興
邪煽孽氛文武幾能匡復得揚名翻屬一釵裙

其三

山河鼎沸鬼神驚戈戟叢中過此生將相君臣原
有分英雄兒女自多情忠心不許深深用烈士無

端故故阬惜有奇謀沉大水只今風雨怒難平

其四

難慮安危咫尺中自屠黎庶自矜功轉將兵火歸
羣盜可有忠貞奉主公叩地無言愁漠漠呼天不
應視夢夢青樓信是操霜節怨血桃花點扇紅

其五

蚩蚩百姓有何辜熱血新屍積道途寇去荒城人
作鬼兵經廢壘婦尋姑書生有魄蒼天奪酷吏無
頭厲鬼誅三百餘年深澤重幾人狗難棄微軀

其六

淡日淒風冷劍旗皇天此意禁人知綠江豈洗三生恨彩筆空填數曲詞洞徹深宮時已去久傾大厦力難支保身誤國何須論不屬諸公更有誰

其七

金陵王氣已全消主帥無功戰士驕懦弱遣誰調玉燭模稜空有佩金貂滿庭簫管晨開宴萬帳貔貅夜望刁諸鎮飄零丞相死負心國戚送南朝

其八

任他往事廢悲歡情重身輕欲改難猛虎磨牙空悵望怒蛟奮鬣起波瀾金風團扇三秋冷苦雨高樓五夜寒歌舞已空征戰罷漁樵無事話甘酸

北鎮廟途次中秋

膾膾平臯夜氣清一輪出海月光平碧天如水煙雲淨銀漢無波星斗明節到秋中時颯爽樹經風過影縱橫長空萬籟深更寂惟見冰蟾玉宇瑩

曉度喜峰口

重疊關河動客思東風駘蕩暮春時雞聲喚醒行

人夢日色偏明酒店旗茅舍方炊松葉竈垂楊兼
護杏花枝澗泉流碧珍珠迸山鳥呼名永晝遲

春雨

昨宵新雨小池平殘夢猶聞滴瀝聲簾捲苔痕綠
戶入窗開杏萼傍簷明遠山無際青初沐芳草多
情綠漸成雨笠煙簑圖畫裏綠楊村畔見春耕

密雲曉晴

水秀山明識好春和風吹暖淨浮塵閑鷗野鷺多
依岸梁燕林鶯不避人霽樹綠濃垂柳嫩晴花紅

滿小桃新流雲披絮歸遙岫三月初晴正上旬

校武宿拈花寺曉起

古寺鐘聲破夢初明星欲隱夜寒餘虛窗漸白梵
音起遠岫微紅旭彩舒校武終朝看技藝言情無
暇愧琴書輸他老衲清閒甚晨誦楞嚴得自如

元日早朝

扶桑朝旭耀瞳矓天仗旌旗颺景風闐闐門開金
殿曙氤氳香靄瑞煙融衣冠劍珮千官肅禮樂車
書四海同玉帛萬方朝會日

聖人端御紫宸宮

鄭邸以自製荷葉短檠鐙見贈詩以謝之

短檠雅製範成蓮繼晷芸窗校簡編刻燭好催詩
句速囊螢羞並炷光延膏融露浥花含潤焰耀霞
明葉帶妍書室增輝叨見贈不愁夜月盡簷前

夏書

盤冰銷瘦露空嵌團扇風涼透葛衫稚竹成陰留
蝶宿新荷綻蕊飽蜂銜苔紋近砌青從長草色當
窗綠不芟午靜睡濃人倦起最妨清夢燕呢喃

廢園

綠楊踈地護頽垣猶道當年宰相園深巷蕭條空
有路高樓湮沒漸無痕驚人燕雀斜穿樹滿徑蓬
蒿直到門過眼繁華容易盡夕陽竚立暗消魂

宿永平夜雨

隨風疎密到黃昏簷溜潺湲百道喧晚稼仍須靈
液潤遙峰疊起暮雲繁路途不礙新泥滑河水應
增舊浪渾清夢難成燈焰熄秋窗夜雨最消魂

小春登醫巫閭山觀音閣

峭壁蒼松響北風幽泉珠迸滴玲瓏千尋畫磴凌
霄碧十月霜林逗晚紅片刻餘閒探勝景暫時極
目俯遙空夕陽欲墮循歸徑孤負山容暮靄中

芍藥

娉婷曉起不勝寒露重香濃翠被單綽約太真勻
粉黛輕盈飛燕試羅紈新粧初罷當窗立宿酒纔
消揭帳看麗日晴雲深院宇徘徊十二曲欄干

秋夜

秋色清明淨太虛涼生薄暮雨新餘蕭森風景來

庭院斷續蛩螿到砌除宋玉情懷悲往昔杜陵吟
咏感居諸窗前竹影斜侵幌逢得清輝月出初

輓葉雲素先生

儒林大雅失儀型絳帳空懸罷講經堪痛世間亡
古學翹瞻天上落文星謙和當代欽仁藹醇厚傳
家仰德馨惆悵九京成永別從今長閉草元亭

豐臺賣花廠看菊花

秋色偏鍾樹藝家濃香冷豔是生涯自知柳已成
三徑不解書能富五車汲井頻看澆晚菊開畦無

行在惺堂初集 卷下 七
意種叢麻終年辛苦憐勤動供得他人滿眼花

龍泉菴看玉蘭

雨沐林巒翠秀滋玉峰證約踐相期花開遍樹瓊
瑤燦香馥當庭蜂蝶隨咏物自無江令筆遊春誰
繼謝安詩且拚縱酒邀明月飄落還愁隔歲思

差竣宿靜默寺檢點路上諸詩成咏

途經雨雨慰三農煙靄無分分外濃詩爲識之忘
造次路爲識得意從容數吟斟酌言輕重數典推
敲避疊重數日還歸蘭若宿還思雲起若山峰

贈致仕司農黃左田

林下名儒祝 嘏來清神矍鑠未黃台早欽賦筆
凌班左丞佩詩才步馬枚暫效華封違綠野久辭
榮任謝金臺相逢轉使增惆悵疎廣蒲輪指日回

秋園寓興

玉宇輕颺冷碧梧波光樹影漾模糊蜜脾秋熟藏
雲液荷蓋風傾瀉露珠亦足亭臺銷歲月無勞魂
夢憶江湖捲簾遙望西峰秀蒼靄濃青若畫圖

九日

落帽風高氣候涼
輕雲不雨送重陽
拌將酩酊堪
酬節收得茱萸滿
貯囊紅葉經霜
秋著色黃花映
日曉含香佳辰
每使情懷暢
細咏新詩笑醉狂

送湯敦甫師典試江南

初秋風景到林嵐
古驛斜楊柳外驂
品重名儒欽
久仰論推理學宿
深耽脂車奉使經
曾慣策士司
衡信素諳漫賦離
懷情未已文星卽
看照江南

秋日奉寄葉東卿先生

一別光儀兩度秋
藕花紅老白蘋洲
西窗應起懷

人慮南浦曾經送
客愁憶坐春風思
負笈待看冬日
望歸舟遙知此際
同惆悵明月煙波
獨倚樓

喜雪

六出呈祥表瑞徵
平鋪高下積層層
蟄螭定驗銷
無長市米應知賤
不增亂舞當空風
莫起密飄入
夜勢堪能飛來
蝴蝶團團聚
細碎工夫妙
過滕

聞鄰家鼓吹有感

絃管聲和自綺軒
風飄律呂正黃昏
陽春白雪無
凡調紈袴儒冠
莫等論鐘鼓
銷憂虛歲月
笙歌窮

勝樂林園習池寂寞悲陳跡霜髯催人易斷魂

喜雨

濃雲醞釀霧冥冥正是廉纖晝雨零洗出竹梧光
潑翠溼來苔蘚色含青田中定見生無已簾外何
妨響不停料峭輕寒應莫厭拋書閒坐小牕聽

咏竹

解籜成林碧蔭垂虚心勁節直無敲青枝歷久應
長茂翠色凌寒信不移本異柔條依樹木性殊蔓
草託籜籬都緣雨露滋澆渥會見堅貞貫四時

咏白荷花

清潔偏宜處士家淡粧異俗謝鉛華淤泥無染知
原淨豔冶殊科莫漫誇最愛素香饒蘊藉猶憐碧
葉不橫斜高標合向中流立豈羨爭芳競秀花

七夕

素綵纖纖漾月波天孫此日暫停梭玉繩低案情
無極銀浦昭回恨更多機上鴛鴦空滯怨橋邊烏
鵲已橫河涼風湛露初秋夜幾片輕雲薄似羅

其二

瓊珮雲輶渡漢波天機鴛錦住金梭經年離緒從
宵艾隔歲愁懷自曉多但信蜘蛛能網合更無精
衛會填河開襟樓上如鈎月瓜果相將摩睺羅

九日

敲窗木葉響蕭蕭鳴雁南征度碧霄喜有黃花酬
晚節幸無華髮負良朝楓經霜淺參差染柳入秋
深取次凋芳酒盈樽新穀熟重陽風雨興偏饒

春雨

鶯聲啼過浴沂天細雨濛濛入夏先苔蘚青濃芳

徑潤來牟碧秀綺塍鮮高樓捲幔情無極遠陌尋
春思悵然綠老紅稀三月暮宜人生意滿庭前

初秋雨

蒼茫空翠濕岩堯序轉新涼徧沈寥萬里秋容雲
意重一天爽氣雨聲驕懸崖積溜散珠玉古木過
風弄管簫百道溪流不住清冷好爲滌炎歊

奉賀樸庵司寇兩公子同捷禮闈

忠厚家傳講誦聲丹山雛鳳韻雙清蟾宮攀桂同
輝煥雁塔標題並顯榮黃卷青燈勤志毅玉堂金

馬待登瀛年來愧我吟懷減佇看蘇庭著令名

秋夜

涼逗幽軒夜枕知中庭雨過物華滋安排銀蒜垂
簾額位置金猊貯被池竹影搖窗風細細桂香滿
院月遲遲紅牆低案天如水正是宵深露下時

咏白梅花

玉立亭亭不染塵敲冰鏤雪作精神高標合占羣
芳首淡泊先回大地春性近林泉應皎潔色殊紅
紫故清新待看雨露催成實調鼎方知莫比倫

紙鳶

韶光點染在雲端裁翦筠筠箋繪羽翰倚漢韻能宣
淑氣凭欄人不怯輕寒樹頭莫使低身過花外頻
勞極目看把握應知絲力弱長空浩渺挽風難

贈陳芝楣中丞

槩戟欣承過訪頻箴言欽佩感情親玉堂夙仰聲

華美

謂臚唱以一
甲入翰林

宸翰初頒雨露新

謂

義莊二字
御賜

荆楚義莊昭睦族

蘇松水利信仁民蒼生繫念殷康濟政治誠無愧

古人

秋日玉泉山勘工作

崔巍樓閣望中遙絕頂浮圖插碧霄樹色葱蘢嘉
氣鬱泉聲鬢沸玉波饒長空雨過雲仍積遠嶼秋
生暑不驕百頃芰荷環四面蓬瀛深處隔塵囂

中秋日荅顧藹庭工部

椿

用前詩韻

遲遲宮漏隔花遙案戶銀河傍九霄皓皎冰輪秋
夜滿繽紛金粟桂香饒今夫愛士推誰切久矣知
君不我驕珠玉才華輝朗徹新詩早許絕浮囂

垂釣

綠陰堤畔釣垂絲片刻餘閒得所宜斜照穿林明
蒼蔚微風渡水縐漣漪天心倒印層波處池面空
含萬象時縱使魚潛徒設餌情懷多在靜中知

和韓厚卿聽裴蘅石撫琴韻

長夏閒窗日似年聽君促軫韻冷然知音應歎今
時罕揮手翻驚古調鮮柔滑輕清琴理妙抑揚起
伏俗聲捐幸逢安道追隨數定許宮商指下傳
祁竹軒大司寇贈端溪青花石硯詩以謝之

堅貞在抱復含和墨沼安恬不起波紫璞蘊山應
駐鷺青花懷水現旋螺端方能守愁予忒情性偏
移賴汝磨宜與結鄰惟厚重愧無銀管記長歌

拜

賜御馬並大小圖各一恭紀

天馬西來渥水濱繪圖會荷

品題仁雄姿拜

賜榮無極妙畫叨

頒澤更新扈

輦調良馴緩轡趨

朝蹠躩踏輕塵總然竭盡馳驅力報稱難酬

異數頻

潘芝軒相國以庚子闈中詩書扇和韻奉贈

玉尺頻持記各三

原注典鄉會試各三提學者三

臨池健筆興仍

酣文章華國心如水衡鑑掄才月止潭守素胸懷
情不厭有容言語味餘甘我慚經濟輸公富解悟
於詩愧李枏

暮春卽景

撫罷絲桐把釣竿楊花初舞杏花殘碧波展鏡瑩
平沼芳草鋪茵映曲欄雲影橫飛空外度天光倒
印水中看柳陰靜愛斜陽晚坐對林塘興未闌

落花二首

落花萬片點青苔搖颺橫空拂面來縈緒只應招
酒伴關情端合作詩媒且教到地鋪園徑遮莫因
風上硯臺前度流鶯枝畔語紅稀綠暗費疑猜
妒芳風雨五更寒吟咏曾經綵筆干無奈落英吹
作陣却殊飛絮結成團相將舊恨留花賊貪戀餘

香剩蜜官感慨有人傷遲暮言懷慰我臭如蘭

送春

蝶懶鶯慵戴勝飛送春無那落紅稀留連未忍從
今別契闊還成隔歲違已見枝頭櫻顆熟又看階
下笋芽肥日長檢點琴書罷高捲筠簾待燕歸

送李竹醉廉訪

振翥

之任山東

蒼生霖雨望君來好待青齊幕府開報國文章聯
棣萼標名翰苑繼鄒枚謨陳明弼唐虞佐念切耕
桑幹濟才不棄芻蕘叨過訪龍門今日喜追陪

八月二十二日五十生辰蒙

賜福壽字諸珍恭紀

福壽駢頌

御墨新球琳錦繡拜諸珍忝承 先澤霑

天祿更荷

殊榮感

聖仁力政可稀從此歲知非莫敢企前人庸愚無
補

鴻施厚幸奉 慈歡樂意真

仲春池上

風暖天桃二月開四圍絳雪繞亭臺階前綠淺抽
芳草石上青新長嫩苔樹影不隨流水去燕泥能
帶落花來晝長人倦慵酬應靜几橫琴日幾回

春日懷古

千古風流百代知六朝詞賦各相宜碧雞金馬歸
陳迹曲榭層臺老習池賈誼徒勞空有策杜陵已
往更無詩世情冷暖催霜鬢惆悵閒庭落照時

咏盆中牡丹

名花護惜貯層軒含態鮮穠斗室溫靜養暖香遲
捲幔長留春色預栽盆品題紅杏應無語比並天
桃合斷魂準備琴樽相對汝爲教燈下伴黃昏

獲舊端硯有感

閱世徒傷歎逝波幾經才士手摩抄心長守默忘
言久志不干名得味多成器豈能辭困苦無瑕方
可耐研磨試思今日相珍意應較當年更若何

贈陸立夫方伯因公入都過訪

春深日午正朝回喜遇公車過訪來繫柳連錢須
莫解啼花杜宇慢頻催新詩味淡知難盡舊雨情
殷得暫陪忽漫相逢復相別轉教懷抱不能開

暮春垂釣

景物清和洽雨暘野花開徧各爭芳平蕪不解傷
春暮高樹應知戀夕陽波縐輕紋風有跡岸鋪落
瓣土生香就魚移釣渾難慣深淺無端費品量

暮春池上晚步

莫愁春色老林園且喜成陰綠葉繁水底層巒雲
倒影沙間疊浪漲留痕魚吹落絮浮清沼蝶趁飛

花過短垣小立長隄觀物候柳絲無語怨黃昏

牡丹二首

朝來庭院散輕寒穠豔輕盈湛露溥姿態高標迎
曉日精神綽約壓迴欄芳叢花願留陰護古寺人
宜放眼看千朶明霞舒錦繡東風珍重莫摧殘
花信風和次第催藉晴麗色滿樓臺蜂爭嫩蕊飛
還止蝶戀幽香去復回色逞嬌嬈留返照葉分蔥
蘗與新苔未開已落無人問競慕穠芳日日來

清明日曉起鼓琴

垂金柳線受風斜曉日曛曛上碧紗室靜香煙能
正直手和琴調絕囂譁泠泠響奏宮商協裊裊音
餘興趣賒孤負清明無細雨林中紅杏盡開花

長夏曝書

萬卷層層手自排古人模範作梯階篤行莫使初
終異盡信能教性氣乖費我連朝勤皮閣喜他得
地免沈埋鑽研編簡真如蠹鬢雪無情減壯懷

秋雨十二韻

密絲疎點落層霄靜院紗窗正寂寥深巷苔痕滋

細雨小池波影皺輕颺廉纖潤漬垣衣溼料峭風
吹石髮搖陰覆郊坳山隱隱涼生臺榭水迢迢殘
荷綠瘁餘莖老早桂黃鮮著色嬌爽透胸襟吟思
逸韻添園館畫情饒階前斷續蛩音切天半淒清
雁唳遙卽影幽懷人意倦始知秋景客魂銷碧看
葱蒨蕪仍滿青見蕭森樹未凋子美新詩悲節序
班姬團扇感寒宵稻粱已報金穰慶時令洵欣玉
燭調暗淡長空雲漠漠染毫揮灑破無聊

秋雨二十韻

廉纖如織復瀟瀟水木清華溽暑銷盈目散絲終
永日灑空浥物到深宵簷端篆作蝸牛集牖隙塵
停野馬消軒受風多搖幕幔衣經爽透厭羅綃窗
紗莫掩由涼入香靄無妨出戶飄潤礎已知從昨
夜爲霖准擬至來朝崧嶺翠重嵐容濕葱蒨青濃
樹色饒小院花光皆作態曲欄竹韻盡含嬌柳條
穿雨參差滴荷蓋擎珠錯落跳秀穗傳紅禾子粒
宿根茁碧稻孫苗人將振筆詩懷逸景對開簾畫
趣超習靜耽幽宜翰墨怡情悅性引歌謠新題快

意除惆悵妙境娛神慰寂寥薄霧迷茫遮大地細
流宛轉瀉平橋路憎泥滑頻閱展船愛波添待放
橈俯見白魚游沼面側看紫鴛舞塘腰比隣竈爨
浮煙直隔寺鐘聲遞響遙最喜太虛雲淡淡恰逢
天宇晚迢迢漁欣極浦施罟便農慶甘膏應候調
翻憶客途秋思迴旅魂欲斷不堪招

十二月十二日雪因效歐陽文忠公禁體

不限

以鹽玉鶴鷺絮蝶飛舞之類
爲比仍不使皓白潔素等字

滕六乘時朔吹嚴捲帷四望曉仍添豐亨有象鋪

平野灑落無聲到畫簷應候咸知宜宿麥呈祥早
識慶窮閭堆高詎碍擎松頂積重難妨折竹尖東
郭履殘彰敗敝山陰棹返適怡恬干人未便袁安
臥策蹇興思鄭棨拈粟起肌膚渾不厭光搖覩視
更何嫌待看鳥雀連朝餒定驗蝗蝻百尺潛巨室
瓦溝迷若砥小池冰鏡瑩開奩推敲漫企前賢事
對景揮毫愧子瞻

雨過

風定柳絲直雨餘蟬韻繁徘徊松徑晚涼月正黃

昏

見新月

山深萬籟寂新月一鈞明
旅館客無寐寒宵聞雁聲

夜月

一片關山月深更坐獨看
輪升雲路靜光照夜窗寒

題唐雷文琴

微風入長松明月照江浦
萬慮寂靜時冷然希太

古

四時田園雜興四十八首用宋范成大韻

村社迎春爆竹聲春衣未換製初成
田家不識嬉游事爲課農桑過一生

駒隙怱怱急若催池冰趁暖漸融開
農夫未理東疇事先到村前祝社來

南陌迎陽柳漸青東風解凍趁春畊
荷鋤緯耒勤收拾曉起呼兒日未明

殺雞爲黍竈燃柴茅舍今朝宴客來
僂指新春如

許日籬間爆竹剩殘灰

二月春分起殷雷青青草色一年迴兒童騎犢長
堤牧背上橫吹短笛來

春深蠶起葉聲喧遶舍新桑碧籠煙老嫗相將年
幼婦筠籃兩兩大堤邊

昨宵新雨漲溪頭漁父乘流放釣舟不入市廛塵
慮少一生惟愛是林邱

日曛社散踏青迴春後仍寒雪染梅祭罷分來神
賜酒兒童燈下學傾杯

初晴春雨愜農懷上已臨流競覆盃野老久諳田
畝事醉談直到月明迴

瓜田鋤理正勤勞淳樸鄉鄰無竊搔遮護短籬長
蔓孃枝頭花謝綴青桃

成陰桑逕麥含包寒食炊煙禁昨宵門外清流添
碧皺幾家遠近隔溪橋

春深三月水平畦新長魚苗味正肥絲網安排溪
畔去金鱗捕得貯籃歸

初夏田園綠已肥送春桃李落紅稀銜泥燕子渾

忙却高捲筠簾任意飛

四月初晴曉尚寒徐風吹透葛衣單水車鎮日飈
輪轉塍畔池塘貯水寬

池中荷葉小於錢麥穗花黃兆有年鋤徧田疇長
日午養苗風景乍晴天

風起平疇麥漾波初晴新綠上漁蓑家家場地勤
收拾共說今年結穗多

五月新絲欲上機老蠶化作白蛾飛繅車頻拽完
公稅剩得餘絲自織衣

連宵急雨漲河流稻隴傾餘貯別溝村市今朝平
米價肩擔車載上街頭

遶村濃綠盡桑麻二麥豐收富積家粒粒翻匙銀
屑滑圃人又說早嘗瓜

夏仲郊居氣候涼穿檐乳燕自雙雙游魚獺逐翻
層浪飛蝶鶯捎入小窗

罷鋤歇午餉壺漿時有薰風送稻香結得荳棚時
避暑濃陰滿架綠雲涼

鷗伴成羣逐水嬉溪邊無暑倦忘歸老漁放棹深

蘆裏驚起還從柳港飛

流汗沾身正午鋤清泉解渴潤腸枯辛勤只願收
成早獲得秋糧好納租

晚歸農散趁斜陽閒話今年暑日長滿月上時無
一事風搖樹影到藤牀

遶村高樹果初紅秋野秋花綻幾叢怪道蝶蜂飛
勢怯昨宵密雨引涼風

家家砧杵動秋聲振槁風來自掩扃野老酡顏村
社散溪橋策杖數明星

巢簷鳥雀慣忘機落毳風吹到客衣多事狸奴偷
著眼一聲驚去入花飛

煙霧初晴著地低陣風吹逐晚霞飛黃雲滿地誰
收拾恰好週遭綠樹圍

珍重場功日日難宜晴宜雨復憂寒倉箱漫貯頻
籌畫秋稅先償給到官

剩有秋葵向日垂淡雲微雨總相宜犉牛舐犢閒
棲隴老叟羣居聚話時

身心安樂屬潛夫一棹煙波覓遠湖秋水長天空

行在恒堂文集
萬里市城可及野人無

遠岫餘青澗水平近郊郭外恰新晴村頭古寺籠
秋色向晚冰蟾倍覺明

家家編籍築新倉莫待秋深露染霜不暖不寒場
事急老翁扶杖課兒郎

秋色平空到野家漁樵耕讀各生涯村前村後無
非樹籬外籬邊盡是花

舍前溪水足新魚網得鮮肥尺半鱸有酒不愁今
日醉邀留入夜月明無

霜染山楓秋欲深高低紅葉逗遙林田家不愛閒
花草辜負黃華滿地金

團蕉老屋北風高颭影殘楓徧野郊小雀趁隨晴
午暖將雛飛舞覓簷巢

暎影三竿暖若烘負暄又惹困蒙蒙掃來落葉供
茶竈籬下蕭蕭振晚風

乘屋新更幾束茅日穿紙罅透窗寮短籬剩挂枯
枝葉風過還疑弄玉簫

晝掩柴扉淡靄籠糠燈茶竈貯房櫳門無車馬心

多靜睡到窗前曉日紅

攜扶兒孫入社宮初冬報賽祝田公今年穡事多
收穫預卜春來拓畛東

昨宵雲重曉還晴一夜寒風水澤凝遶舍閒行溪
岸畔漁舟衝破半潭冰

淺土深培種芥菘釀成新酒味偏濃田家自適田
家味不羨雞豚早晚供

無事偏知夜正長睡餘撥火煮茶湯枯枝燃作松
明炬唯覺輕煙細細香

芋栗煨根笋就蒸輒紅香稻味偏清官租輸罷無
他事鎮月何曾入市城

兒童歡戲鼓聲催快雪初晴煖漸來索笑梅花開
了未新春又向臘前迴

聲喧爆竹徧柴門訊問咸知賀早春山裏村農無
甲子全憑布穀促耕人

村婦渾忘綺繡情紡車斜曳縛枯荆布衣經浣隨
身煖不羨天孫錦製成

寶劍四首用明王世貞韻

手持秋水出匣看雲裏芙蓉滿目寒今日太平應
買犢早嗤壯士別燕丹

其二

曾傳滄海擊長鯨隱約濤痕透鏐生重向延津覓
伴侶每聞風雨氣難平

其三

魚鱗繡澀影迷離擬傍三山劔紫芝但恐化龍飛
匣去干霄氣已見雄雌

其四

白虹在握霞垂繚秋水泠泠隱怒濤繞指吹毛應
不捲昆吾漫說呂虔刀

夢中詩

漏下香殘夜氣清凝思無語不勝情迴廊閒步慵
無力斜倚欄干看月明

雨後

昨宵春暖暮雲生細雨霏霏滴到明催徧郊園生
意滿隔牆遙聽賣花聲

清河道中作

行有恒室初集
雨裏輕塵曉霽新楊花散漫逐風勻兩行驛柳甃
甃碧日送長途作客人

晚行密雲道中

夕陽欲落漸黃昏小憇乘涼傍野村極目長空天
際遠好從西嶺識雲根

午晴

睡起焚香漫試茶日穿雲隙透窗紗初晴庭院午
風細砌角玉簪都作花

秋夜

添香靜愛夜窗幽簷際微茫透月鉤蛩語階除人
未寐初涼天氣近中秋

曉起

紙窗曉日上溫暾簷際頻聞野鳥喧喚醒行人千
里夢方知身在古山村

曉山牧牛

秋風秋雨曉餘陰霧鎖孤村隔遠岑稚子牧牛紅
樹下教人錯認是桃林

興京道中卽景

曉霧將雲散碧空故鄉風景暮秋中山如圖畫行
無盡看遍青林次第紅

己丑十月十二日歸途至山海關海上觀月
天淨雲衢雁字橫小春候暖朔風輕從容按轡平
沙暮看海歸來月正明

蝴蝶十六首

昨宵好雨勝醍醐百草爭開若畫圖啟蟄東風催
破繭雙雙飛出小春駒

屈伸橘蠹上林梢感化乘時作繭包數日蛻來鬚
翅足翩翩學舞近堂坵

曬粉初乾翅乍伸一朝羽化倍精神相將逐對穿
花去看爾逍遙富貴春

雨晴雲淡困人天風送飛花落幕前粉蝶相隨來
冉冉還驚團扇過墻顛

游春人去趁晴朝草色平鋪淺碧遙駿馬踏花香
有跡追隨蛺蝶過溪橋

戀芳栩栩隱花叢疊翅拳鬚宿蕊中飲露臨風清
若許高標消受淑光融

翩翩曾說葛仙衣記否前身朽麥微造物不遺餘
力剩偏因腐溼解生機

庭院朝來湛露濃紗牕晴景煖從容徐風輕颺低
枝顫攪起花間蝶夢慵

嫩草蒙茸鋪徑斜梧桐成蔭綠交加淡黃蛺蝶憐
香甚緩翅輕隨自落花

無端春色滿平臯菜圃澆畦舉桔槔小蝶羣飛貪
野卉芬菲紅紫雜蓬蒿

游枝戲葉太匆忙雙翅翻飛戀色香珍重黃鶯深

樹裏綠陰靜處暗潛藏

貪近芳菲興未降雨餘芍藥綻芸窗嬌黃淡白相
兼至下上徘徊各自雙

百花已過葉離披稚筍成林解籜時蝴蝶也知無
意緒往還猶自戀殘枝

化生小物待吹噓蠢蠢形成兩翼舒長養有功渾
不識高飛得意最憐渠

茵苔爭開碧葉齊晚涼池館日沉西人閒散步看
花久蝴蝶飛飛過曲堤

見汝輕盈度態多花香雨潤及時和秋來百卉凋
零後霜露生寒可奈何

小雨卽止

濃陰潑墨掩斜陽瞥見廉纖送晚涼轉瞬雲從天
際散鳴蟬高樹遞音長

雨後歸途至懷柔馬上口占

河水深逾前日渡山光濃重去時看曉行策馬涼
生袂禾黍芄芄潤未乾

古北口外卽景

高秋紅葉勝明霞風急山深雁字斜酒旆炊煙飄
颺處疎籬圍繞野人家

冬曉

短夢初迴曙色明宵長枕簟覺寒生紙窗料峭人
慵起臥聽風吹落葉聲

仲春望夜玩月

雲淨天高月倍明光風細細晚來輕階除小立清
無極靜聽遙傳夜漏聲

清明後二日薊州道中馬上口占

雨裏長途萬斛塵平疇宿麥茁茁新不寒微暖清
明後春色偏宜行路人

三月晦日

煙柳垂絲遶鏡池營巢紫燕語門楣海棠已過了
香老綠暗紅稀麥秀時

冬日圍爐

朔風送冷颺埃塵斗室爐溫暖若春莫道身安無
別慮應思乏術禦寒人

題裕容齋畫瓶中折枝菊花牡丹卽次題畫

原韻二首

牡丹舒萼菊交枝共貯瓶中各自宜賦性雖然分
冷暖推原無競莫相疑

冷豔羣芳與伍難孤高曾耐暮冬寒可知歷盡冰
霜後纔共春花一律看

六月晦日曉起

簷際橫參夜艾斜朦朧曙色上窗紗長空殘月尙
未墮露重風清開藕花

溪上

行在恒室夜集
三
溪上登臨意悄然碧波無際下前川盈虛消長渾
閒事獨立秋風夕照天

咏牡丹

羣花開遍始芳菲燦勝明霞一尺圍只爲天工饒
雨露令人無不羨光輝

晝晚小雨

密雲輕雨過池塘洗出芙蓉細細香天與閒情良
獨厚北窗消受晚風涼

晚霽

禾黍葱蘢翠色濃前溪新漲瀉溶溶初晴碧宇清
如洗漏洩秋聲到暗蛩
晚風送爽透絺衣過雨晴雲繞翠微貪看煙波閒
立久忘機白鷺近人飛

垂柳

名園池畔託根株密葉柔條若畫圖空見扶疎饒
綠蔭取材能作棟梁無

晚雨

雨驕雲密晚生涼風透窗紗草木香坐久不知更

行在恒室初集
漏永新秋天氣夜初長

玉泉山勘工口占

碧殿彤軒映曉霞
新秋水木秀清華
扁舟放棹煙波裏
兩岸蕭蕭紅葦花

香山臥佛寺勘工口占

探源一逕入煙霞
非比閒遊玩歲華
玉宇初晴明曉日
清幽院落綻秋花

昌平道上雨中口占

含煙弱柳綠初成
草暖沙平雨未晴
天爲養花雲

不散恐教春色太分明

冬日病中晨起見盆梅盛開口占一首

冷豔幽香綻素梅
窗前晨起自徘徊
須知斗室回春早
不比凌寒次第開

咏盆中海棠

幽軒位置避繁霜
絳淺紅深試曉粧
春睡足時饒豔麗
不鈎簾幕不焚香

畫閣宵來夢不成
海棠解語若含情
詩懷酒病知多少
付與幽人細品評

數枝爛熳近牀前
嬌小丰姿最可憐
何用春陰來護惜
長教斗室貯鮮妍

暈碧裁紅錦作枝
移栽盆盎恰相宜
東風逞惡園花落
正是窗中得意時

病中聞雨聲隔窗見桃作花口占

桃花作態太娉婷
况復朝來細雨零
小院輕寒人臥病
不知春已遍園庭

清明

淡雲疎雨薄寒輕
垂柳含煙綠漸成
鳥語花香春

淑穆一年最好是清明

卽事

大地春回暖氣舒
日長坐久識清虛
瑤琴曲罷心神寂
且自焚香讀道書

睡起

香殘爐冷几眠琴
秋雨當窗作好音
一夢黑甜初覺後
六塵不住見吾心

行有恒堂初集卷下終

海昌許誦恆漢

陽葉名灃謹校

乙巳之夏

誦恆

隨華陽相國查三庫始得瞻

仰定邸顏色丙午春復隨留京王大臣同

往刑部訊案更面承定邸訓示焉是冬奏

開

玉牒館

上命

定邸及華陽壽平兩相國為總裁

誦恆

幸

與纂修之役凡繕檔校冊諸務皆蒙定邸

訓諭周詳藉無舛誤曾於公暇成中秋夜月

詩命和題唱風雅不減河間東平也所著古

今體詩不下三數千首 定邸手自編次得

若干首為行有恒堂初集 誦恆 與葉潤臣 名

澧 中翰分任校讐先登梨棗 定邸之才識

器量所以贊

皇猷而襄

盛業者經濟即可於文章見之至其盡美盡善凌

轍古今則華陽相國壽陽尚書兩序已道其

詳游夏不敢贊一詞云

道光戊申七月許誦恆謹跋



